

Pinngitsaaliissummik unitsitsinermi periutsit pillugit Namminersorlutik Oqartussat nalunaarutaat

Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuseqarneq pillugu Inatsisartut inatsisaanni nr. 24-mi, 3. december 2012-imeersumi § 8, imm. 3, naapertorlugu aalajangersarneqarput:

Kapitali 1

Nakorsamik aggersaaneq

§ 1. Napparsimasup tarnimigut nappaateqarsorinartup nammineq katsorsartinnissi isumaginngippagu, tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuseqarneq pillugu Inatsisartut inatsisaanni § 6, imm 1, naapertorlugu unitsitsinissaq siunertaralugu qanigisaasut peqqinnissaqarfimmut attaveqassapput.

Imm. 2. Napparsimasup qaniginerusai tassaapput aappaasoq, inooqataasoq, angajoqqaat, qitornat inersimasut, napparsimasullu inoqutai. Napparsimasoq paaqqinniffimmiippat, unitsitsinissaq siunertaralugu peqqinnissaqarfimmut attaveqarnissamut pisussaaffik sulisuniippoq.

§ 2. Qanigisaasut allalluunniit peqqinnissaqarfimmut saaffiginninngippata, politiit tamatumunnga pisussaaffeqarput.

Kapitali 2

Nakorsaq unitsitsisoq

§ 3. Nakorsap napparsimasoq misissoreerlugu unitsinneqarnissaa pisariaqartoq paasiguniuk, Inatsisartut inatsisaanni § 3, imm. 1-imi aalajangersagaq naapertorlugu nakorsap napparsimasoq uninnissaanut akuersitinniassavaa, tamatumunngalu atatillugu Inatsisartut Inatsisaanni § 3, imm. 2, naapertorlugu pingaartumik uninnerup siunertaanik peqqissinerusinnaanerlu pillugit ilitersorlugu.

Imm. 2. Inatsisartut inatsisaanni § 4, imm. 1, naapertorlugu pissutsit apeqqutaatillugit, napparsimasoq uninnissamut apeqqut pillugu naammaginartumik piffissalerlugu eqqarsarfissinneqassaaq.

§ 4. Napparsimasoq paasissutissinneqareerluni unitsinneqarnissamut akuersinngippat, pinngitsaaliissummik unitsinneqarnissaa pisariaqarnerloq nakorsamit naliliivigineqassaaq.

Imm. 2. Inatsisartut Inatsisaanni § 5 naapertorlugu piumasaqaatit eqquutsinneqarpata pinngitsaaliissummik unitsitsisoqassaaq.

§ 5. Pinngitsaaliisummik unitsitsisoqassappat, nakorsaq nappaatip suusinnaanerani, napparsimasup tarnimigut pissusaanik nakorsallu Inatsisartut inatsisaanni § 5, imm. 1 (katsorsartittariaqarneq) imal. imm. 2 (navianartorsiortitsisinnaaneq) naapertorlugu, piumasaqaatit eqquutsinneqarnerannut isumaqataanermik imalimmik nalunaarusiussaaq.

Imm. 2. Nalunaarut unitsitsinissaq pineqartoq siunertaralugu, nakorsap nammineq misissuineranik tunngaveqassaaq.

Imm. 3. Misissuineq naammassiniariarpat piaarnerpaamik nalunaarusiortoqassaaq.

Imm. 4. Pinngitsaaliisummik unitsitsisoqarnissaa siunertaralugu nalunaarut nakorsap politiinut tunniutissavaa imal. nassiutissavaa.

Kapitali 3

Pinngitsaaliisummik unitsitsineq

§ 6. Pinngitsaaliisummik unitsitsinissap isumagineqarnissaa politiit aalajangiivigissavaat.

§ 7. Pinngitsaaliisummik unitsitsinissamut aalajangiisussap, pinngitsaaliisummik unitsitsinermut atatillugu Inatsisartut inatsisaanni piumasaqaatit eqquutsinneqarnerat, tamatumunngalu atatillugu Inatsisartut inatsisaat naapertorlugu periusissap eqquutsinneqarnera, nakorsallu nalunaarutaa paasisutissanik pinngitsaaliisummik unitsitsinissamut tunngavissatut pisariaqartitanik imaqarnersoq misissussavaa.

§ 8. Sumi pinngitsaaliisummik unitsitsi soqarnissaa, ingerlaannaq unitsitsinissaq pisariaqanngippat, qaqugu tamatuma pinissaa pillugu, politiit Dronning Ingridip Napparsimmavissuani tarnimikkut nappaatilinnut immikkoortortaarfik isumaqatigiissuteqarfigissavaat. Inatsisartut inatsisaanni § 1, imm. 2, naapertorlugu Peqqinnissaqarfiup immikkoortuini allani ingerlaannaq pinngitsaaliisummik unitsitsisoqarallartariaqassappat, Dronning Ingridip Napparsimmavissuani tarnimikkut nappaatilinnut immikkoortortaarfik, napparsimasup immikkoortortamut qaqugu nuunneqarnissaa pillugu, piaarnerpaamik attavigineqassaaq.

§ 9. Inatsisartut Inatsisaanni § 5, imm. 1 (katsorsartittariaqarneq) naapertorlugu pinngitsaaliisummik unitsitsisoqarpat, nakorsap unitsitsisup napparsimasumik misissuineranut atatillugu pinngitsaaliisummik unitsitsisoqanngippat, pinngitsaaliisummik unitsitsinissap qaqugu pinissaa pillugu, politiit nakorsamut unitsitsisumut ilisimatitsissapput. Pinngitsaaliisummik unitsitsinissap qaqugu pinissaa aalajangiivigineqarniariarpat, piaarnerpaamik ilisimatitsissutigineqassaaq.

Imm. 2. Pinngitsaaliisummik unitsitsinermi nakorsaq unitsitsisoq sapinngisamik peqataassaaq. Tamatumani Inatsisartut inatsisaanni §§ 3 aamma 38 naapertorlugit nakorsaq napparsimasumik ilitersueqqissaaq, pinngitsaaliisummillu unitsitsinissamut piumasaqaatit eqquutsinneqarnerat misissussallugu.

§ 10. Pinngitsaaliisummik unitsitsinermi Inatsisartut inatsisaanni § 5, nr. 2 (navianartorsiortitsisinnaaneq) naapertorlugu nakorsap misissuinerani ullup unnuallu kingulliup ingerlanerani pisimanersoq, Inatsisartullu

inatsisaanni § 7, imm. 3 (katsorsartittariaqarneq) naapertorlugu unitsitsineq, ullut arfineq marluk kingulliit iluanni pisimanersoq politiit misissussavaat.

Imm. 2. Inatsisartut inatsisaanni § 7, imm. 3, naapertorlugu piffissaliussat eqquutsinneqanngippata, nakorsap napparsimasumik misissueqqinneratigut unitsitsinissamullu tunngatillugu nutaanik allagartaliornikkut aatsaat pinngitsaaliisummik unitsitsisoqarsinnaavoq.

§ 11. Pinngitsaaliisummik unitsitsineq Inatsisartut inatsisaanni § 4, imm. 3, naapertorlugu, pisariaqanngitsumik kanngutsatsitsisoqaqqunagu akornuseeqqunaguluunniit, sapinngisaq tamaat qajassuatumik malunnaarsaartumillu ingerlanneqassaaq. Politiit peqataasut sapinngisaq naapertorlugu inuinnartut atisaqassapput. Napparsimasoq politiit biiliinik angallanneqassappat, sapinngisaq tamaat inuinnaat biilii suliffimmi atorineqartartut atorlugit angallanneqassaaq.

§ 12. Pinngitsaaliisummik unitsitsinnginnermi sapinngisaq tamaat napparsimasup qanigisaa ataaseq arlallilluunniit, pinngitsaaliisummik unitsitsinissaq pillugu politiit ilisimatinneqassapput.

Imm. 2. Napparsimasup najugaqataa/najugaqatai imal. najugaqarfia sapinngisaq tamaat isumaqatigalugit pinngitsaaliisummik unitsitsisoqassaaq.

Imm. 3. Imm. 1 naapertorlugu pinngitsaaliisummik unitsitsinnginnermi ilisimatitsisoqarsinnaasimangippat, napparsimasup qanigisaa ataaseq arlallilluunniit pinngitsaaliisummik unitsitsineq pillugu, politiit piaarnerpaamik tamatuminnga ilisimatinneqassapput.

Kapitali 4

Napparsimasup unitsinneqarnera

§ 13. Dronning Ingridip Napparsimmavissuani tarnimikkut nappaatilinnut immikkoortortaqarfimmi pinngitsaaliisummik uninngavissuami nakorsaanerup, Inatsisartut inatsisaanni § 8, imm. 2, naapertorlugu pinngitsaaliisummik unitsitsinermi piumasaqaatit eqquutsinneqarsimanersut aalajangiivigissavai. Nakorsaanerup peqannginnerani tarnimikkut nappaatilinnut immikkoortortaqarfimmi nakorsaq alla aalajangiisuusinnaavoq. Taamaattoqartillugu aalajangiineq nakorsaanermit piaarnerpaamik isummerfigineqassaaq.

Imm. 2. Inatsisartut inatsisaanni § 5, nr. 2 (navianartorsiortitsisinnaaneq) naapertorlugu pinngitsaaliisummik unitsitsisoqarpat, napparsimasoq ingerlaannaq unitsinneqassaaq.

Imm. 3. Inatsisartut inatsisaanni § 5, nr. 1 (katsorsartittariaqarneq) naapertorlugu pinngitsaaliisummik unitsitsisoqarpat, napparsimasoq nakorsamit misissortereernerup kingorna piaarnerpaamik, kingusinnerpaamillu ullut arfineq marluk qaangiutsinnagit unitsinneqassaaq.

Kapitali 5

Atuutilersitsineq

§ 14. Nalunaarut 16. december 2013 atuutilersinneqarpoq.

Steen Lynge

/

Ann Birkekær Kjeldsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut